

**Perbarisan Dahului Perasmian Perhimpunan Agung Umno 2011**  
**Bernama**  
**1 Disember, 2011**

KUALA LUMPUR, 1 Dis (Bernama) -- Majlis perasmian Perhimpunan Agung Umno 2011 dimulakan dengan upacara perbarisan dan menaikkan bendera Umno di Dataran Putra, Pusat Dagangan Dunia Putra (PWTC) di sini, Khamis.

Presiden Umno Datuk Seri Najib Tun Razak, yang juga Perdana Menteri tiba pada pukul 8.50 pagi berbaju Melayu biru bersama isteri Datin Seri Rosmah Mansor, disambut timbalannya Tan Sri Muhyiddin Yassin dan pemimpin Umno yang lain.

Najib yang diiringi Muhyiddin dan Setiausaha Agung Umno Datuk Seri Tengku Adnan Tengku Mansor telah naik ke pentas untuk menerima tabik hormat daripada komander perbarisan ketiga-tiga sayap Umno Irwanzi Idrus sebelum memeriksa perbarisan.

Beliau kemudian diiringi Ketua Wanita Umno Datuk Seri Shahrizat Abdul Jalil, Ketua Pemuda Umno Khairy Jamaludin dan Ketua Puteri Umno Datuk Rosnah Abdul Rashid Shirlin memeriksa perbarisan 150 anggota ketiga-tiga sayap Umno, yang terdiri daripada 50 anggota pergerakan Wanita, 50 Pemuda dan 50 Puteri.

Presiden Umno kemudian menaikkan bendera Umno "Sang Saka Bangsa" di sebuah pentas khas yang disediakan, diiringi nyanyian lagu Umno "Bersatu, Bersetia, Berkhidmat" oleh para hadirin.

Perhimpunan agung kali ini, yang berlangsung selama lima hari, melibatkan 5,447 perwakilan.

---BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsindex.php?id=631016>